



Extrait de la revue **SingulierS** du 1^{er} trimestre 2013

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

Rubrique : **Éditorial**

Binamés lijeûs, tins d' l' anêye 2012, dj' avans bin fiêsté lès trante ans d' nosse ruvûe, jusse après lès min.mes ans du Muzée dul Parole. Dju sans a l' âdje du rêzon èt dj' ans trwâs bons ustîs pou fwêre dul bèle ovradge dins lès-anêyes ki vnèt : ène colèccion « Parole du terroir » k' è èdité dpus carante lîves, mès ossi dès cassètes, CD èt DVD ; ène ruvûe avu dès bokèts d' tous lès janres pou tous lès gouts ; èt dpwîs l' an passé, in site intèrnèt ki va rinde noste ovradge bin pus visibe, nôns tèmwnadjes èt nôns bokèts bin mîs counus. Dèrant cès trantes anêyes la, brâmint dès djins ont ovré pou nosse lingadje èt nôns tradicions. Dju sondjans ôs cès ki n' sont pus la, ôs-ancyins ki nous ont acouradjé èt moustré, èt a tous lès cés ki ovrèt asteûre, sins rovier lès lijeûs, lès vîs abounés, ku sins zêns noste ovradge n' ôrot nin d' sans'. Asteûre inla, nu djans nin ku l' mèyeû èst passé, mès, dijans l' bin fwârt : lu mèyeû èst a vnu !

Tins dès prumîs mwès du ç't-anêye 2013 ci, dj' ans oyu ossi l' plêji d' vèye ku nosse Muzée, nosse ruvûe, nôns scrîjeûs, astint rcounus dins toute la Walonîye ; ç' còp la dj' ans sté invité a rprésanter nosse soce a deûs évènements mètus su pîd pa deûs soces du rèfèrance pou nôns ptits lingadjes : la *Société de Langue et de Littérature wallonnes* (SLLW) et le *Conseil des langues régionales endogènes de la Fédération Wallonie-Bruxelles* (CLRE).

Dèrant la fwâre du lîve du Brussèle, lu CLRE, èt sa dirèctrice Nadine Vanwelkenhuyzen, mètèt su pîd in stand avu lès publicâcions dins nôns ptits lingadjes (walon, gômès, picard...), mès ossi ène djoûrnêye dès *Langues régionales*, avu dès-invités, dès conférences/débats, dès rascontes avu lès-ôteurs... Adon, ç't-anêye ci, Joël Thiry, nosse administrateur jènèral astot invité pou côzer du « crime » (lu tin.me dul Rasconte), ca i s' è moustré in mwèsse sucrlîjeûs dins l' domin.ne, avu la parucion d' sès deûs ovradjes : « *12 fêmes* » èt « *12 omes* ». Ô mwès d' fèvrî al Louvière, c' èst la SLLW k' è invité lès djins d' *Singuliers* pou fiêster leûs 30 ans, avu lès djins du *Mouchon d' Aunia* (100 ans) èt lès « Rêlîs nameurwès » ki fiêstint lès 75 ans dès *Cahiers Wallons*. Ké firté pou nous-ôntes d' èsse an si bone compagnîe. Dju sans su la bone vøye mès djins, dumèrans-î !

Pierre OTJACQUES